

觀音菩薩經藏



觀音菩薩經藏

觀音菩薩經藏

中華民國二十年七月

◎每冊定價壹角

外埠酌加郵費

編述及校訂者 佛學書局

印刷者 上海開北交通路西聯義里  
天星久記印刷公司

總發行所 開北新民路國慶路口  
佛學書局

分銷處 開北火車站東首寶山路口  
各埠佛經流通處

## 觀音菩薩經藏序

世間萬類交鬩。音聲雜出。則囂而不靜也。吾人妙明真性。在耳爲聞。則常而不滅也。以不斷滅之聞性。時聞種種之音聲。此衆生所以多隨聲流轉。起惑造業。而常淪苦趣也。若夫返聞聞自性。入流忘所。從耳根以證圓通者。唯觀世音菩薩。菩薩旣以耳而證圓通。一根返原。六根解脫。惟解脫故。而六根互用。故於世界音聲。不曰聞而曰觀。此菩薩自利之功也。有自利之功者。乃可以言利人。自利之功愈深。則利人之用愈妙。菩薩惟證此圓通之道。所以能用威神之力。救度一切衆生。卽我佛世尊亦曾深爲讚歎。如地藏經見聞利益品中。『佛告觀世音菩薩。汝於

娑婆世界。有大因緣。若天若龍。若男若女。若神若鬼。乃至六道罪苦衆生。聞汝名者。見汝形者。戀慕汝者。讚歎汝者。是諸衆生。於無上道。必不退轉。常生人天。具受妙樂。因果將熟。遇佛授記。』他如菩薩之十四無畏也。三十二應也。既載於楞嚴經。更載法華經之普門品矣。如是等經。猶人所常見。除此而外。尚有多種經文。宣說菩薩慈能與樂。悲能拔苦之妙行。爲人所不常見者焉。嗚呼。舉世盡從忙裏過。幾人肯向死前修。縱有信根之人。亦多奔走衣食。而無暇以讀佛書。況三藏祕笈琅函。多如山積。能具充滿之法喜。向幾千卷寶藏堆中。搜羅聖典。以資修學。因之自利以利人者。蓋亦鮮矣。彼未曾得覩佛書之人。甚有專認菩薩爲女身者。似此缺乏佛教中之常識。既不識菩薩之身分爲何如。復不詳

其與樂拔苦之所以然。卽無從而發生一念恭敬之心。則任何苦厄當前。旣無以感。自無有應。誠未免有負菩薩慈航普渡之恩矣。六月十九爲菩薩成道之期。佛學書局。上念菩薩慈悲。四顧羣生苦厄。特廣爲搜集菩薩經文。爲人所不常見者若干章。彙成一卷。名曰觀音經藏。以爲紀念菩薩之品。並以便善信印送結緣之需要。囑余作序。以誌因緣。竊以見此經藏者。卽與親見菩薩現身說法無異。惟願生難遇想。發菩提心。自己持誦。更以勸人。輾轉流傳。自他兼利。所以副菩薩之本願。卽所以暢十方如來之本懷。何以故。菩薩爲過去正法明如來故。菩薩經呪。無非與樂拔苦故。華嚴經普賢行願品曰。『令一切衆生生歡喜者。卽令一切如來歡喜。』智者其篤行之。

民國二十年夏劉士安謹誌於上海佛學書局編輯部

## 觀音菩薩經藏目次

- 一 華嚴經善財二十七參觀自在章
- 二 觀世音菩薩授記經
- 三 悲華經大施品受記品
- 四 消伏毒害陀羅尼經
- 五 觀無量壽佛經
- 六 大悲呪經
- 七 十一面神呪經
- 八 不空縹索呪心經
- 九 密部十六種經



大方廣佛華嚴經入不思議解脫境界普賢

行願品卷第十六

(卽第二譯華嚴經)

善財童子二十七參觀自在菩薩章

毗瑟底羅居士告善財言。善男子。於此南方有山。名補怛洛迦。彼有菩薩。名觀自在。皆詣彼問菩薩云。何學菩薩行。修菩薩道。爾時居士。因此指示。卽說偈言。

海上有山衆寶成。

賢聖所居極清淨。

泉流縈帶爲嚴飾。

華林果樹滿其中。

最勝勇猛利衆生。

觀自在尊於此住。

汝應往問佛功德。彼當爲汝廣宣說。

時善財童子。禮居士足。遶無數匝。慇懃瞻仰。辭退而去。爾時善財童子。蒙居士教。隨順思惟。一心正念。入彼菩薩深信解藏。得彼菩薩能隨念力。憶彼諸佛出現次第。見彼諸佛成等正覺。持彼諸佛所有名號。觀彼諸佛所證法門。知彼諸佛具足莊嚴。信彼諸佛所轉法輪。思彼諸佛智光照耀。念彼諸佛平等三昧。解彼諸佛自性情淨。修彼諸佛無分別法。契彼諸佛甚深法印。作彼諸佛不思議業。漸次前行。至於彼山。處處求覓此大菩薩。見其西面巖谷之中。泉流縈映。樹林鬱鬱。香草柔輭。右旋布地。種種名華。周徧嚴飾。觀自在菩薩。於清淨金剛寶葉石上。結跏趺坐。無量菩薩皆坐寶石。恭敬圍遶。而爲宣說智慧光明大慈悲法。令其

攝受一切衆生。

善財見已。歡喜踊躍。於善知識。愛樂尊重。合掌恭敬。目視不瞬。作如是念。善知識者。卽是如來。善知識者。一切法雲。善知識者。諸功德藏。善知識者。難可值遇。善知識者。十力寶因。善知識者。無盡智炬。善知識者。福德根芽。善知識者。一切智門。善知識者。智海導師。善知識者。集一切智助道之具。作是念已。卽便往詣大菩薩所。

爾時觀自在菩薩。遙見善財告言。善哉善來童子。汝發大乘意。普攝衆生。起正直心。專求佛法。大悲深重。救護一切。住不思議最勝之行。普能拯拔生死輪迴。超過世間無有等比。普賢妙行。相續現前。大願深心。圓滿清淨。勤求佛法。悉能領受。積集善根。恆無厭足。順善知識。不違其教。

從文殊師利功德智慧大海所生。其心成熟。得佛威力。已獲廣大三昧光明。專意希求甚深妙法。常見諸佛。生大歡喜。智慧清淨。猶如虛空。既自明了。復爲他說。安住如來智慧光明。受持修行一切佛法。福智寶藏。自然而至。一切智道。速得現前。普觀衆生。心無懈倦。大悲堅固。猶若金剛。

爾時善財童子。詣菩薩所。禮菩薩足。遶無數匝。合掌而住。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者。善能教誨。願爲我說。

爾時觀自在菩薩摩訶薩。放闍浮檀金妙色光明。起無量色寶燄網雲。及龍自在妙莊嚴雲。以照善財。卽舒右手。摩財頂。告善財言。善哉善哉。

善男子。汝已能發阿耨多羅三藐三菩提心。善男子。我已成就菩薩大悲速疾行解脫門。善男子。我以此菩薩大悲行門。平等教化一切衆生。攝受調伏。相續不斷。善男子。我恆住此大悲行門。常在一切諸如來所。普現一切諸衆生前。隨所應化而爲利益。或以布施攝取衆生。或以愛語攝取衆生。或以同事攝取衆生。或現種種微妙色身攝取衆生。或現種種不思議色淨光明網攝取衆生。或以音聲善巧言辭。或以威儀勝妙方便。或爲說法。或現神變。令其開悟而得成熟。或爲化現種種色相。種種族姓。種種生處。同類之形。與其共居而成熟之。善男子。我修習此大悲行門。願常救護一切衆生。令離諸怖。所謂願一切衆生離險道怖。離熱惱怖。離迷惑怖。離繫縛怖。離殺害怖。離王官怖。離貧窮怖。離不活

怖。離惡名怖。離於死怖。離諸病怖。離懈怠怖。離黑暗怖。離遷移怖。離愛別怖。離怨會怖。離逼迫身怖。離逼迫心怖。離憂悲愁歎怖。離所求不得怖。離大衆威德怖。離流轉惡趣怖。復作是願。願諸衆生。若念於我。若稱我名。若見我身。皆得免離一切恐怖。滅除障難。正念現前。善男子。我以如是種種方便。令諸衆生離諸怖畏。住於正念。復教令發阿耨多羅三藐三菩提心。至不退轉。

爾時觀自在菩薩摩訶薩。欲重明此解脫門義。爲善財童子而說偈言。

善來調伏身心者

稽首讚我而右旋。

我常居此寶山中

住大慈悲恆自在。

我此所住金剛窟。

莊嚴妙色衆摩尼。

常以勇猛自在心

坐此寶石蓮華座。

天龍及以修羅衆。

緊那羅王羅刹等 如是眷屬恆圍遶 我爲演說大悲門。  
汝能發起無等心 爲見我故而來此。 愛樂至求功德海  
禮我雙足功德身。 欲於我法學修行 願得普賢眞妙行。  
我是勇猛觀自在 起深清淨大慈悲。 普放雲網妙光明  
廣博如空徧清淨。 我垂無垢臚圓臂 百福妙相具莊嚴  
摩汝深信善財頂 爲汝演說菩提法 佛子應知我所得  
一相一味解脫門 名爲諸佛大悲雲 祕密智慧莊嚴藏。  
我爲精勤常救護 起諸弘誓攝衆生 憐愍一切如己身  
常以普門隨順轉。 我於無數衆苦屨 常能救護諸羣生  
心念禮敬若稱名 一切應時皆解脫。 或遭牢獄所禁繫

杻械囚執遇怨家

若能至心稱我名

一切諸苦皆銷滅。

或犯刑名將就戮

利劍毒箭害其身

稱名應念得加持

弓矢鋒刃無傷害

或有兩競詣王官

諍訟一切諸財寶

彼能至誠稱念我

獲於勝理具名聞。

或於內外諸親屬

及諸朋友共爲怨

若能至誠稱我名

一切怨家不能害。

或在深林險難處

怨賊猛獸欲傷殘

若能至心稱我名

惡心自息無能害。

或有怨家懷忿毒

推落險峻大高山

若能至心稱我名

安處虛空無損壞。

或有怨家懷忿毒

推落深流及火坑

若能至心稱我名

一切水火無能害。

若有衆生遭厄難

種種苦具逼其身

若能至心稱我名



一切解脫無憂怖。

或爲他人我所謗。

常思過失以相讎。

若能至心稱我名。

如是怨嫌自休息。

或遭鬼魅諸毒害。

身心狂亂無所知。

若能至心稱我名。

彼皆消滅無諸患。

或被毒龍諸鬼衆。

一切怨怖奪其心。

若能至誠稱我名。

乃至夢中皆不見。

若有諸根所殘缺。

願得端嚴相好身。

若能至誠稱我名。

一切所願皆圓滿。

若有願於父母所。

承順顏色志無違。

歡榮富樂保安寧。

珍寶伏藏恆無盡。

內外宗族常和合。

一切怨隙不來侵。

若能至誠稱我名。

一切所願皆圓滿。

若人願此命終後。

不受三塗八難身。

恆處人天善趣中。

常行清淨菩提道。

有願捨身生淨土。

普現一切諸佛前

並於十方佛剎中

常爲清淨勝薩埵

普見十方一切佛

及聞諸佛說法音

若能至誠稱我名

一切所願皆圓滿。

或在危厄多憂怖

日夜六時稱我名

我時現住彼人前

爲作最勝歸依處

彼當生我淨佛剎

與我同修菩薩行

由我大悲觀自在

令其一切皆成就。

或清淨心興供養

或獻寶蓋或燒香

或以妙華散我身

當生我剎爲應供。

或生濁劫無慈愍

貪嗔惡業之所纏

種種衆苦極堅牢

百千繫縛恆無斷

彼爲一切所逼迫

讚歎稱揚念我名

由我大悲觀自在

令諸惑業皆銷滅。

或有衆生臨命終

死相現前諸惡色

見彼種種色相已

令心惶怖無所依。若能至誠稱我名。彼諸惡相皆消滅。  
由我大悲觀自在。令生天人善道中。此皆我昔所修行。  
願度無量羣生衆。勇猛精勤無退轉。令其所作皆成就。  
若有如應觀我身。令其應念咸皆見。或有樂聞我說法。  
令聞妙法無量邊。一切世界諸羣生。心行差別無央數。  
我以種種方便力。令其聞見皆調伏。我得大悲解脫門。  
諸佛證我已修學。其饒無量功德海。非我智慧所能知。  
善財汝於十方界。普事一切善知識。專意修行無懈心。  
聽受佛法無厭足。若能聞法無厭足。則能普見一切佛。  
云何見佛志無厭。由聽妙法無厭足。

爾時觀自在菩薩說此偈已。告善財言。善男子。我唯得此菩薩大悲速疾行解脫門。如諸菩薩摩訶薩。已淨普賢一切願。已住普賢一切行。常行一切諸善法。常入一切諸三昧。常住一切無邊劫。常詣一切無邊刹。常觀一切諸如來。常聞一切三世法。常息一切衆生惡。常長一切衆生善。常絕衆生生死流。常入如來正法流。而我云何能知說彼功德行。爾時善財童子聞觀自在菩薩摩訶薩說此大悲清淨偈已。歡喜踊躍。充徧其身。生愛敬心。增信樂心。發清淨心。從坐而起。偏袒右肩。右膝着地。禮菩薩足。長跪合掌。於菩薩前瞻仰一心。以偈讚曰。

天人大衆阿修羅

及與一切諸菩薩

以妙言音共稱讚

大聖智慧深如海。

能於一切衆生中

平等大悲同一味

一智同緣普救護  
種種苦難皆消滅。  
菩薩最勝神通力  
令大山王咸震動。  
反覆大地不爲難  
又能乾竭於大海  
號曰大悲觀自在  
云何我以微劣智  
聖者菩薩大名聞  
我聞聖者諸功德  
無斷無盡大悲門  
於仁聖德能稱讚。  
生我智慧辨才力。  
我今處於大眾會  
因是發起清淨心  
稱揚讚歎妙莊嚴  
恭敬至誠無懈倦。  
以大勇猛而觀察  
映蔽一切諸梵天  
菩薩吉祥妙色身  
如大梵王居梵衆  
菩薩顧視同牛王  
妙色融朗如金聚  
處於衆會無倫匹。  
普利一切諸天人。  
種種華鬘以嚴飾  
具足廣大菩提願  
光明淨妙過諸天  
威德尊嚴超世主  
頂上眞金妙寶冠

圓光狀彼深虹遠

外相明如淨月輪

頂相豐起若須彌

端嚴正坐如初日

腰繫金條色微妙

現殊勝相放光明

伊尼鹿皮作下裙

能令見者生歡喜

妙身種種莊嚴相

衆寶所集如山王

腰垂上妙清淨衣

如雲普現無邊色

眞珠三道爲交絡

猶如世主妙嚴身

恆放淨光普照明

亦如朗日遊空界

身色淨妙若金山

又如瞻博迦華聚

以白瓔珞爲嚴飾

如白龍王環遶身

世主手執妙蓮華

色如上妙眞金聚

毗瑠璃寶以爲莖

大慈威力令開發

出過天人之所有

普放光明猶日輪

顯現如在妙高山

香氣普熏於一切。

於諸惡鬼部多等

黑蛇醉象及師子

癡火毒害蔽慈心	及餘種種諸危難	重苦繫縛所傷迫
一切恐怖無依怙	世主一味大悲心	平等救彼衆生類。
妙寶葉石爲勝座	無等蓮華之所持	百千妙福之所成
衆妙蓮華所圍遶	極妙身光清淨色	從眞勝義而成就。
諸天種種上妙供	咸共讚歎仁功德	於尊能發清淨意
速離一切憂怖心	眷屬快樂共歡娛	一切妙果皆圓滿。
大海龍王住自宮	及餘居處諸龍衆	常懼妙翅大鳥王
搏撮傷殘受諸苦。	或有衆生入大海	遇風鼓浪如雪山
若遭摩竭欲來吞	恐怖驚惶無所救	或遇醉象而奔逐
種諸厄難之所纏	至心憶念大悲尊	如是一切無憂怖。

大石山王有洞窟  
其窟幽深極可畏  
種種繫縛投於彼  
彼諸苦惱衆生等  
枷鎖解脫苦銷除  
一切無憂安隱樂  
攝取意念諸衆生  
令於一切厄難中  
我今讚歎人天主  
最勝威德大仙王  
福智無涯如大海  
調伏衆生無懈倦  
願於菩薩妙金山  
一切勝福皆成就  
息滅衆生邪見心  
速獲如來無上身  
普願衆生咸證得  
普於十方諸世界  
有犯王法鎖其身  
至心憶念大悲尊  
仁以大悲清淨手  
獲得無憂安隱樂  
三毒翳障盡消除  
利樂平等無怨親



觀世音菩薩得大勢菩薩授記經

佛言。過去廣遠。無量不可思議阿僧祇劫。有世界名無量德聚安樂。示現佛號金光師子遊戲國。土清淨嚴飾。比阿彌陀佛莊嚴之事。如毛端水。金光師子佛國。如大海水。爾時有王。名曰威德。奉事如來。佛爲演說無量法印。所謂慈愍衆生無量。莊嚴淨土無量。乃至一念善根。應迴向無量。王於園觀。入於三昧。左右二蓮華。從地涌出。二童子化生其中。王以偈問二童子。願說名號。右面童子偈答曰。一切諸法空。云何問名字。過去法已滅。當來法未生。現在法不住。仁者問誰名。左面童子偈答曰。名名者悉空。名名不可得。欲求真實名。未曾所見聞。說名字語言。皆是假施設。我名爲寶意。彼名爲寶上。於是與王俱詣佛所。二童以偈問佛。

云何爲供養。無上兩足尊。華香衆伎樂。衣服藥臥具。如是等供養。云何爲最勝。佛說偈言。當發菩提心。廣濟諸羣生。設滿恆沙劫。珍妙莊嚴具。奉獻諸如來。及歡喜頂戴。不如以慈心。迴向於菩提。是福爲最勝。餘供無過者。超踰不可計。必成等正覺。二童復說偈言。諸天龍鬼神。聽我師子吼。今於如來前。弘誓發菩提。生死無量劫。本際不可知。爲一衆生故。爾數劫行道。况此諸劫中。度脫無量衆。修行菩提道。而生疲倦心。我若從今始。起於貪欲心。瞋癡慳嫉等。是則欺世尊。不起聲聞心。亦不求緣覺。當於萬億劫。大悲度衆生。如今日佛土。清淨妙莊嚴。令我得道時。超踰億百千。佛告華德藏。彼威德王。我身是也。二童子觀音勢至是也。於彼佛所。初發菩提心。華德藏言。彼未發心。成就甚深智慧。了達名字不

可得佛言。恆河沙可知數。此大士先供養佛。種諸善根。不可稱計。雖未發心。而以不可思議莊嚴。於諸衆生。最爲勇猛。當來曠遠。不可計劫。阿彌陀佛涅槃後。或有衆生。不見佛者。有諸菩薩。得念佛三昧。常見阿彌陀佛。佛滅後。一切寶物。浴池蓮華。衆寶行樹。常演法音。與佛無異。正法滅時。過中夜分。明相出時。觀世音菩薩成等正覺。號普光功德山王。如來。其佛國土。莊嚴之事。諸佛於恆沙劫。說不能盡。

悲華經大施品受記品節錄

佛告寂意菩薩。往昔過恆河沙等阿僧祇劫。此佛世界。名刪提嵐。是時大劫。名曰善持。轉輪聖王。名無諍念。王有千子。第一太子。名曰不胸。第二

得大勢，第三文殊，第四金剛智，第五虛空印，第六虛空日，第七師子香，第八普賢，第九阿闍，第十香山，終竟三月供養寶藏如來。及比丘僧奉諸所安。一如聖王。如是千子。各各供佛。如第一太子。各各發心。或願忉利天王。或求梵王。或求魔王。或求轉輪聖王。或願大富。或求聲聞。是諸王子。其中乃至尙無一人求於緣覺。况求大乘。時轉輪王。因布施故。而復還求轉輪王位。爾時大臣寶海梵志。周徧到於閻浮提內。一切人所乞求所須。先要施主歸依三寶。發菩提心。復勸諭天龍鬼神等。發菩提心。時一切衆生。無一不從梵志發菩提心者。爾時寶海梵志。勸轉輪王發菩提心已。復白太子。回向菩提。太子答言。我先還宮。端坐思惟。還來佛所。畢定發心。願取種種淨妙佛土。禮佛而去。至本宮殿。在一屏處。思惟修習。種種莊嚴。已佛世界。於七歲中心無欲欲。乃

至無有香味觸想。得見十方世界。一一方面。如萬佛土微塵數等諸佛。世界所有莊嚴。如其所見。隨而取之。過七歲已。轉輪聖王。受記作佛。號無量壽。太子言。我今觀於地獄衆生。多諸苦惱。人天之中。或有垢心。以垢心故。數數墮於三惡道中。世尊。今我以大音聲。告諸衆生。我之所有一切善根。盡回向阿耨多羅三藐三菩提。願我行菩薩道時。若有衆生。受諸苦惱恐怖等事。退失正法。墮大暗處。憂愁孤窮。無有救護。無依無舍。若能念我。稱我名字。若其爲我天耳所聞。天眼所見。是衆生等。若不免斯苦惱者。我終不成阿耨多羅三藐三菩提。復發勝願。無量壽。佛正法初滅。卽成阿耨多羅三藐三菩提。寶藏佛尋爲授記。善男子。今當字汝。爲觀世音。汝行菩薩道時。已有百千無量億那由他衆生。得離苦惱。

汝爲菩薩時。已能大作佛事。無量壽佛般涅槃已。正法滅盡。汝於後夜。在菩提樹下坐金剛座。於一念間。成等正覺。號徧出一切光明功德山王如來。

請觀世音菩薩消伏毒害陀羅尼經節錄

一時佛住毘舍離菴羅樹園大林精舍。與千二百五十比丘。菩薩二萬人俱。時毘舍離國人民。遇大惡病。一眼赤如血。二兩耳出膿。三鼻中流血。四舌嚙無聲。五所食化爲粗澀。六識閉塞。猶如醉人。有五夜叉。面黑如墨。而有五眼。鈎牙上出。吸人精氣。城中有一長者名月蓋。詣佛白言。此國遇惡病。良醫耆婆。盡其道術不能救。唯願世尊慈愍一切。救濟病

苦。世尊告言。去此不遠。正立西方。有佛名無量壽。有菩薩名觀世音。大勢至。恆以大悲。憐愍一切。救濟苦厄。汝當五體投地。向彼作禮。燒香散華。繫念數息。令心不散。經十念頃。爲衆生故。請彼佛及二菩薩。說是語時。於佛光中。得見無量壽佛。并二菩薩。如來神力。佛及菩薩。俱到此國。住城門闔。放大光明。照毘舍離。皆作金色。毘舍離人。卽具楊枝淨水。授觀世音菩薩。大悲觀世音。憐愍救護一切衆生。作是言。汝等當一心稱南無佛。南無法。南無僧。南無觀世音菩薩摩訶薩。大悲大名稱。救護苦厄者。如此三稱三寶。三稱觀世音菩薩名。五體投地。向於西方。一心一意。令氣息定。合掌說偈言。願救我苦厄。大悲覆一切。普放淨光明。滅除癡暗冥。爲免毒害苦。煩惱及衆病。必來至我所。施我大安樂。我今稽首。

禮。聞名救厄者。我今自歸依。世間慈悲父。唯願必定來。免我三毒苦。施我今世樂。及與大涅槃。白佛言。如是神呪。畢定吉祥。聞此呪者。衆苦永盡。得念佛定。現前見佛。我今當說十方諸佛救護衆生神呪。說呪已。毘舍離人。平復如本。爾時世尊。憐愍衆生。重請觀世音菩薩。說消伏毒害呪。觀世音大悲熏心。說破惡業障。消伏毒害呪。佛告阿難。此神呪名施一切衆生甘露妙藥。無病畏。橫死畏。繫縛畏。貪欲瞋恚愚癡三毒等畏。故娑婆世界。皆號觀世音爲施無畏者。

觀無量壽佛經

次復應觀觀世音菩薩。此菩薩身長八十萬億那由他由旬。身紫金色。



頂有肉髻。項有圓光。面各百千由旬。其圓光中有五百化佛。如釋迦牟尼。一一化佛。有五百化菩薩。無量諸天。以爲侍者。舉身光中。五道衆生。一切色相。皆於中現。頂上毘楞伽摩尼寶。以爲天冠。其天冠中。有一立化佛。高二十五由旬。觀世音菩薩。面如閻浮檀金色。眉間毫相。備七寶色。流出八萬四千種光明。一一光明。有無量無數百千化佛。一一化佛。無數化菩薩。以爲侍者。變現自在。滿十方世界。臂如紅蓮華色。有八十億微妙光明。以爲瓔珞。其瓔珞中。普現一切諸莊嚴事。手掌作五百億雜蓮華色。手十指端。一指端。有八萬四千畫。猶如印文。一一畫。有八萬四千色。一一色。有八萬四千光。其光柔軟。普照一切。以此寶手。接引衆生。舉足時。足下有千輻輪相。自然化成五百億光明臺。下足時。有金

剛摩尼華布散一切。莫不彌滿。其餘身相。衆好具足。如佛無異。唯頂上肉髻。及無見頂相。不及世尊。作是觀者。不遇諸禍。淨除業障。除無數劫生死之罪。如此菩薩。但聞其名。獲無量福。何況諦觀。若欲觀者。先觀肉髻。次觀天冠。其餘衆相。亦次第觀之。

千手千眼無礙大悲心陀羅尼

經節錄

一時佛在補陀落迦山。觀世音宮殿寶莊嚴道場中。與無央數菩薩。無量大聲聞。無量天龍八部神等。皆來集會。時觀世音菩薩。密放神通光明。照耀十方刹土。皆作金色。日月之光。皆悉不現。總持王菩薩。見此。怪未曾有。問佛如此神通之相。是誰所放。佛言。今此會中。有菩薩名觀世音。自在從無量劫來。成就大慈大悲。善能修習無量陀羅尼門。爲欲安

樂諸衆生故。密放如是大神通力。觀世音菩薩白佛言。我有大悲心陀羅尼呪。今當欲說。爲諸衆生。得安樂故。得壽命故。得富饒故。除滅一切惡業重罪故。增長一切白法諸功德故。速能滿足一切諸希求故。唯願世尊。慈悲聽許。佛言。汝大慈悲。安樂衆生。欲說神呪。如來隨喜。觀世音言。我念過去無量億劫。有佛名千光王靜住如來。彼佛憐我。及一切衆生。說廣大圓滿無礙大悲心陀羅尼。以金色手摩我頂上言。汝當持此心呪。普爲未來惡世一切衆生。作大利樂。我於是時。始住初地。一聞此呪。故超第八地。卽發誓言。若我當來。堪能利益安樂一切衆生者。令我身千手千眼具足。發是願已。應時具足十方千佛。悉放光明。照觸我身。及十方無邊世界。欲誦持者。於衆生起慈悲心。先當從我發願。南無大

悲觀世音。願我速知一切法。南無大悲觀世音。願我早得智慧眼。南無  
大悲觀世音。願我速度一切衆。南無大悲觀世音。願我早得善方便。南  
無大悲觀世音。願我速乘般若船。南無大悲觀世音。願我早得越苦海。  
南無大悲觀世音。願我速得戒定道。南無大悲觀世音。願我早登涅槃  
山。南無大悲觀世音。願我速會無爲舍。南無大悲觀世音。願我早同法  
性身。我若向刀山。刀山自摧折。我若向火湯。火湯自消滅。我若向地獄。  
地獄自枯竭。我若向餓鬼。餓鬼自飽滿。我若向修羅。惡心自調伏。我若  
向畜生。自得大智慧。發是願已。至心稱念我之名字。亦應專念我本師  
阿彌陀如來。然後誦呪。一宿滿七徧。除滅身中百千萬億劫生死重罪。  
若諸人天。誦持大悲章句者。臨命終時。十方諸佛。皆來授手。欲生何等

佛土隨願皆得往生。誦持大悲神呪。墮三惡道者。我誓不成正覺。誦持大悲神呪。若不生諸佛國者。我誓不成正覺。誦持大悲神呪。於現生中一切所求不果遂者。不得爲大悲心陀羅尼也。唯除不善。除不至誠。一切十惡五逆。謗人謗法。破齋破戒。破塔壞寺。偷僧祇物。汙淨梵行。如是等一切惡業重罪。皆悉滅盡。唯除一事。於呪生疑者。又誦大悲心呪者。得十五種善生。不受十五種惡死也。一不令飢餓困苦死。二不爲枷禁杖楚死。三不爲怨家仇對死。四不爲軍陣相殺死。五不爲虎狼惡獸殘害死。六不爲毒蛇虻蠍所中死。七不爲水火焚漂死。八不爲毒藥所中死。九不爲蟲毒害死。十不爲狂亂失念死。十一不爲山林崖岸墜落死。十二不爲惡人厭魅死。十三不爲邪神惡鬼得便死。十四不爲惡病纏

身死。十五不爲非分自害死。一生處常逢善王。二常生善國。三常值好時。四常逢善友。五身根具足。六道心純熟。七不犯禁戒。八所有眷屬恩義和順。九資財豐足。十常得他人恭敬扶接。十一所有財寶無他劫奪。十二意欲所求皆悉稱遂。十三龍大善神恆常擁衛。十四所生之處見佛聞法。十五所聞正法悟甚深義。一切天人應常誦持。勿生懈怠。觀世音菩薩說是語已。卽說如是廣大圓滿無礙大悲心大陀羅尼神妙章句。(呪略)

佛告阿難。如是神呪。一名廣大圓滿。一名無礙大悲。一名救苦陀羅尼。一名延壽陀羅尼。一名滅惡趣陀羅尼。一名破惡業障陀羅尼。一名滿願陀羅尼。一名隨心自在陀羅尼。一名速超上地陀羅尼。阿難言。此菩

薩名字何等。善能宣說如是陀羅尼。佛言。此菩薩名觀世音自在。亦名  
撚索。亦名千光眼。此菩薩不可思議威神之力。過去無量劫中。已作佛  
竟。號正法明如來。大悲願力。爲欲發起一切菩薩。安樂成熟諸衆生。故  
現作菩薩。汝等大衆。諸菩薩摩訶薩。梵釋龍神。皆應恭敬。莫生輕慢。一  
切人天。常須供養。專稱名號。得無量福。滅無量罪。命終往生阿彌陀佛  
國。

十一面神呪心經節錄

一時佛在室羅筏竹筍道場。觀自在菩薩。與無量俱胝那庾多百千持  
呪神仙。古稱佛菩薩爲內仙、非世俗之外道仙人、前後圍繞。到已。頂禮佛足。白言。我有神呪心。  
名十一面。具大威力。十一俱胝諸佛所說。我今說之。欲利樂一切有情。

滅一切惡故。心所願求者稱遂故。我不見人天魔梵。以此呪防護其身。而爲一切災橫魔障。刀杖毒藥厭禱呪術所能害者。唯除決定惡業應熟。世尊證知。是事必爾。唯應信受。不應分別。此神呪心。一切諸佛同所稱讚。同所隨喜。我憶過去過殞伽沙劫。即恆沙前有佛名百蓮華眼無障礙頂熾盛功德光王如來。我時作大仙人。從佛受得此呪。見十方佛。應時證得無生法忍。是故淨信男女。當恭敬至心繫念。又過去殞伽沙劫。有佛名美音香。我身作大居士。於佛受得此呪。便於生死超四萬劫。誦持此呪。復得諸佛大悲智藏。一切菩薩解脫法門。

不空絹索呪心經節錄

一時佛在布怛洛迦山。聖觀自在菩薩宮中。無量雜寶樹。周匝莊嚴。大



比丘菩薩天人圍繞。聖觀自在菩薩白佛言。我有神呪心。名不空羅索。往昔九十一劫。有世界名勝觀。佛號世主王如來。我從佛受此呪心。教化無量百千天子。令趣菩提。以是功德。獲十億三摩地。不空妙智爲上首。世尊。若所在之處。有此呪心。其地卽有十二億諸天擁護。若人先造惡業。誹謗正法。及諸佛菩薩。決定應墮無間地獄。彼人若聞此呪。而生悔愧。於一日夜。受持齋戒。讀此神呪。卽能消滅一切罪業。或現世輕受。若熱病。若眼耳鼻舌手足肢節等痛。若疥癬諸瘡。誹謗辱罵。及餘諸惡。逼惱身心。并諸怪夢。以現受故。無間惡業。卽得銷滅。

密部十六種經略

金剛恐怖集會方廣儀軌觀自在菩薩三世最勝心明王經。佛在寶

峯大山宮殿。觀自在菩薩說心真言。及頭頂眼等十五真言。

觀自在菩薩。怛囑多唎。隨心陀羅尼經。佛住極樂世界。觀世音菩薩

說隨心自在王呪。及四十八印法。療一切病壇法。

一切如來真實攝大乘現證三昧大教王經。毘盧遮那如來。在色究

竟天宮。說四大明。詣須彌頂。入三昧。出生十六金剛大菩薩。阿閼寶生。

觀自在王。不空成就四如來。亦各說大明。出金剛像。遮那復出四大明

妃。四如來亦出四明妃。

大方廣曼殊室利觀自在菩薩儀軌經。世尊徧觀淨居天宮。讚歎觀

自在菩薩。授成佛記。大士還就本座。入普光明多羅三昧。從右目瞳放

光。流出妙女。普告衆生。誓度苦海。徧遊世界。還至佛所。禮觀自在菩薩。

持青蓮華。瞻仰而住。

阿嚕力經。觀世音菩薩說唵阿嚕力迦娑嚩訶。此是一切蓮華部心持者生極樂。

廣大蓮華莊嚴曼拏羅滅一切罪呪經。佛在鹿野。梵壽國王。偶至一寺。寺僧用佛頂華鬘迎王。王戴之而頭痛。妹勸見佛。佛說其故。大意菩薩問用常住物果報。佛說決墮地獄。又問救濟之法。佛乃三請觀自在菩薩說呪。

葉衣觀自在菩薩經。佛住極樂世界。金剛手菩薩請觀世音菩薩說葉衣觀自在菩薩呪。并持誦祈願種種法。

大乘莊嚴寶王經。佛在舍衛國。菩薩八部集會。從大地獄出大光明。

照舍衛國。現大莊嚴。除蓋障菩薩請問因緣。佛爲說聖觀自在菩薩歷劫救苦之事。及所住種種三昧之名。

如意輪陀羅尼經。觀自在菩薩白佛。我有大蓮華峯金剛祕密如意輪呪。如摩尼珠。令衆生所願滿足。

佛說一髻尊陀羅尼經。佛在鷲峯。觀自在菩薩從頂化出羅刹王說呪。降伏諸惡神鬼。

佛說陀羅尼集經。觀世音部三卷半。有馬頭觀音法印呪。及千轉觀音心印呪。

觀世音菩薩六字大明呪。一切如來皆不知其所得之處。乃經歷求之。六字。卽唵嘛呢叭彌吽。

千眼千臂觀世音菩薩神經呪。能滅罪治病。降伏魔怨。滿足祈願。請  
雨止雨。種種殊勝功德。有二十五種印呪法。與大悲心呪不同。唐智通譯  
訖、感現

聖證

清淨觀世音菩薩普賢陀羅尼經。佛在靈鷲山。觀世音菩薩說奉請  
呪。結界呪。根本呪。有天女著白衣。跪向菩薩。

一切如來名號呪經。佛初成道。觀自在菩薩說此呪。受持者不墮惡  
道。生天成佛。

聖觀自在菩薩心真言瑜伽觀行儀軌。先觀成本尊聖觀自在菩薩  
身。修諸印呪。次觀行布字法。令己身與本尊身。如彼鏡像。不一不異。

---

觀音菩薩經藏